



Komunikadu Imprensa

17 Dezembru 2012

Milísia Besi Merah Putih na'in 3 hetan kondensasaun ba tinan 6, 9 no 16 Prizaun

Iha 11 Dezembru 2012, Tribunál Distritál Dili halo leitura sentensa ba kazu krime kontra umanidade ne'ebé komete husi milísia Besi Merah Putih na'in 3 ho pena prizaun tinan 6, 9, no 16. Kazu ne'e, akontese iha Suco Ulmera, Sub-distrito Bazartete, Distrito Liquiça iha periodu tinan 1999 nia laran.

“JSMP apresia tebes ho pasu ne'ebé Ministériu Públiku propoin ba atu aplika prizaun preventiva durante ba kondenadu sira durante períodu rekursu atu evita esperiensa hanesan ne'ebé akontese ba kazu Lavio nian ne'ebé hetan kondensasaun tinan 9 prizaun maibe infelizemente akordaun ne'e la aplika tanba kondenadu halai tiha ba Indonezia”, dehan Luis de Oliveira Sampaio, Diretór Ezekutivu JSMP.

Arguidu Faustino Filipe de Carvalho iha tinan 1999 asumi kargu nu'udar xefi aldeia Ulmera no Komandante Milísia BMP nian, tribunál prova katak arguidu komete krime transferensia ho forsa hasoru populasaun sivíl iha Suco Ulmera ba Timór Osidental, Indonézia, no detensaun ilegal feto no kriansa iha Ulmera Relasiona ho kazu ne'e tribunál kondena arguidu ho pena prizaun tinan 6.

Arguidu Miguel Soares (elementu ativu milísia iha Besiten) hetan pena tinan 9 tanba provadu katak arguidu involve iha krime omísidiu kontra vítima Francisco Brás. Entertantu, arguidu Salvador de Jesus (komandante BMP Kasait) hetan pena prizaun tinan 16, tanba arguidu provadu komete krime omísidiu hasoru vítima Felix Barreto no Francisco Brás.

Prosesu leitura sentensa dirije husi Dra. Ana Paula Fonseca, Dr. António Gomes, no Dr. António Quantes. Ministériu Públiku representa husi Dr. Jóse Landim) no defeza akompaña husi Dr. Jóse da Silva husi Eskritóriu Defensória Públiku.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

info@jsmp.minihub.org

Telefone: 3323883 | 77295795

www.jsmp.tl.